

Coinbhinsiún Eorpach um Chearta an Duine



EUROPEAN COURT OF HUMAN RIGHTS
COUR EUROPÉENNE DES DROITS DE L'HOMME

COUNCIL OF EUROPE



CONSEIL DE L'EUROPE



**Coinbhinsiún
Eorpach um
Chearta
an Duine**

An Coinbhinsiún chun Cearta an Duine agus Saoirsí Bunúsacha a Chosaint

An Róimh, 4.XI.1950

Tá na Rialtais is sínitheoirí leis seo, comhaltaí de Chomhairle na hEorpa,

Á bhreithniú dóibh Dearbhú Uilechoiteann Chearta an Duine arna fhógairt ag Comhthionól Ginearálta na Náisiún Aontaithe an 10 Nollaig 1948;

Á bhreithniú dóibh gurb é is aidhm leis an Dearbhú sin aitheantas agus comhlíonadh uilechoiteann agus éifeachtach na gCeart dá bhfógraítear ann a dhaingniú;

Á bhreithniú dóibh gurb í aidhm Chomhairle na hEorpa aontacht níos mó a bhaint amach i measc a cuid comhaltaí agus go bhfuil cothabháil agus fíorú breise Chearta an Duine agus na Saoirsí Bunúsacha ar cheann de na modhanna trína mbainfeadh amach an aidhm sin;

Á athdhearbhú dóibh a gcreideamh domhain sna saoirsí bunúsacha siúd ar a mbunaítear ceartas agus síocháin ar Domhan agus gurb é an daonlathas polaitiúil éifeachtach, de pháirt, agus comhthuisceant agus comhlíonadh Chearta an Duine ar a mbraitheann siad, den pháirt eile, an bealach is fearr lena gothabháil;

Ar a bheith beartaithe acu, mar rialtais fíortha Eorpacha a bhfuil an dearcadh céanna acu agus comhoidhreacht traidisiún polaitiúil, barrshamhaileacha, saoirse agus smacht reachta acu, na chéad bhearta a dhéanamh chun cearta áirithe a dhearbhaítear sa Dearbhú Uilechoiteann a chomh-fhorfheidhmiú,

Ag dearbhú dóibh gur ar na hArdpháirtithe Conarthacha, i gcomhréir le príonsabal na coimheachta atá an phríomhfhreagracht na cearta agus na saoirsí a mhínítear sa Choinbhinsiún seo agus sna Prótacail a ghabhann leis a dhaingniú, agus sa dóigh sin go bhfuil corrlach breithmheasa ann dóibh, faoi réir dhlínse mhaoirseacht na Cúirte Eorpaí um Chearta an Duine a bhunaítear leis an gCoinbhinsiún seo,

Tar éis comhaontú mar a leanas:

AIRTEAGAL 1

Oibleagáid Cearta an Duine a Urramú

Áiríteoidh na hArdpháirtithe Conarthacha do gach duine faoina ndlínse na cearta agus na saoirsí a mhínítear i Roinn I den Choinbhinsiún seo.

ROINN I

CEARTA AGUS SAOIRSÍ

AIRTEAGAL 2

Ceart chun na beatha

1. Cosnófar le dlí ceart gach duine chun na beatha. Ní bhainfeadh a bheatha de dhuine d'aon ghnó seachas trí fhorghníomhú pianbhreithe cúirte tar éis é a chiontú i gcoir lena bhforáiltear an pionós sin le dlí.
2. Ní mheasfar go bhfuil baint beatha d'aon ghnó ina sárú ar an Airteagal seo nuair a leanfaidh sí as fórsa a úsáid nach mó é ná mar is géarghá:

(a) chun duine a chosaint ar fhoréigean neamhdhleathach;

- (b) chun gabháil dhleathach a chur i gcrích nó duine a chosc ar éalú as coimeád dleathach;
- (c) mar ghníomh dleathach chun éirí amach nó círéib a chur faoi chois.

AIRTEAGAL 3

Toirmeasc ar chéastóireacht

Ní dhéanfar céastóireacht ar aon duine ná ní chuirfeadh aon íde nó pionós atá mídhaonna nó táireach ar aon duine.

AIRTEAGAL 4

Toirmeasc ar sclábhaíocht agus ar shaothar éignithe

1. Ní dhéanfar aon duine a choimeád faoi sclábhaíocht ná faoi dhaoirse.
2. Ní chuirfeadh iallach ar aon duine saothar éignithe nó éigeantach a dhéanamh.
3. Chun críche an Airteagail seo, ní fholóidh an téarma "saothar éignithe nó éigeantach":
 - (a) aon obair a cheanglaítear a dhéanamh i ngnáthchúrsa coinneála a ghearrfar i gcomhréir le forálacha Airteagal 5 den Choinbhinsiún seo nó le linn scaoileadh coinníollach ó choinneáil den sórt sin;
 - (b) aon seirbhís de ghné mhíleata nó, i gcás agóideoirí coinsiasacha sna tíortha ina n-aithnítear iad, seirbhís a ghearrfar in ionad seirbhís mhíleata éigeantach;
 - (c) aon seirbhís a ghearrfar i gcás éigeandála nó tubaiste lena mbagraítear ar shaol nó ar shábháilteacht an phobail;
 - (d) aon obair nó seirbhís atá mar chuid de ghnáthoibleagáidí cathartha.

AIRTEAGAL 5

An ceart chun saoirse agus slándála

1. Tá ag gach uile dhuine an ceart chun saoirse agus slándála pearsan. Ní bhainfeadh a shaoirse de dhuine seachas sna cásanna seo a leanas agus i gcomhréir le nós imeachta a fhorordaítear le dlí:

- (a) coinneáil dhleathach duine arna chiontú le cúirt inniúil;
- (b) gabháil dhleathach nó coinneáil dhleathach duine i leith neamhchomhlíonadh a dhéanamh ar ordú dleathach cúirte nó chun oibleagáid a fhorordaítear le dlí a dhaingniú;
- (c) gabháil dhleathach nó coinneáil dhleathach duine chun é a thabhairt os comhair an údaráis dlí inniúil mar gheall ar dhrochamhras le réasún go ndearna sé cion nó nuair a mheastar le réasún go bhfuil a leithéid riachtanach chun é a chosc ar chion a dhéanamh nó a chosc ar éalú tar éis dó déanamh amhlaidh.
- (d) coinneáil duine faoi aois trí ordú dleathach le haghaidh maoirseacht oideachasúil nó a choinneáil dhleathach chun é a thabhairt os comhair an údaráis dlí inniúil;
- (e) coinneáil dhleathach daoine chun scaipeadh galar tógálach a chosc, nó daoine mí-mheabhreacha, alcóligh nó andúiligh drugaí nó fuaidirí;
- (f) gabháil dhleathach nó coinneáil dhleathach duine chun é a chosc ar iontráil neamhúdaraithe a dhéanamh isteach sa tír nó duine a bhfuil caingean á tionscnamh ina choinne d'fhonn díbirt nó eiseachadhadh a dhéanamh.

2. Cuirfeadh in iúl gan mhoill do gach duine a ghabhtar, i dteanga a thuigfidh sé, cúiseanna a ghabhála agus aon chúiseamh ina choinne.

3. Tabharfar gan mhoill gach duine a ghabhtar nó a choinnítear de réir fhorálacha mhír 1 (c) den Airteagal seo os comhair breithimh nó oifigigh eile atá údaraithe le dlí chun údarás breithiúnach a fheidhmiú agus beidh ceart acu triail a bheith acu laistigh de thréimhse reasúnach nó a bheith scaoilte saor fad a bheidh a dtríail ar feitheamh. Féadfar coinníollacha a chur ag gabháil le scaoileadh go dtabharfar gealltanais maidir le láithriú le haghaidh trialach.

4. Beidh ag gach duine a mbainfeadh a shaoirse de trí gabháil nó trí choinneáil an ceart imeachtaí a thionscnamh trína gcinneadh dleathach a choinneála go tapa le cúirt agus trína n-ordófar é a scaoileadh mura dleathach an choinneáil.

5. Beidh ag gach íospartach gabhála nó choinneála de sháru ar fhorálacha an Airteagail seo ceart infhorfeidhmithe chun cúitimidh.

AIRTEAGAL 6

An ceart chun triail chóir a fháil

1. I gcinneadh a cheart agus a oibleagáid sibhialta nó aon chúis choiriúil ina choinne, tá gach duine i dteideal éisteach chóir phoiblí a fháil laistigh de thréimhse reasúnach ó bhíne neamhspleách neamhchlaon arna bhunú le dlí. Fágófar breithiúnas go poiblí ach féadfar an preas agus daoine den phobal a eisiamh ón triail iomlán nó ó aon chuid di ar mhaithe leis an moráltacht, leis an ord poiblí nó leis an tslándáil náisiúnta i sochaí dhaonlathach, i gcás inarb é leas na n-ógánach nó cosaint shaol príobháideach na bpáirtithe déanamh amhlaidh, nó a mhéid a bhfuil géarghá leis i dtuairim na cúirte in imthosca speisialta ina ndéanfadh an phoiblíocht dochar do leasanna an cheartais.

2. Toimhdeofar go bhfuil aon duine a chúiseofar i gcion coiriúil neamhchiontach go dtí go gcruthófar é nó i a bheith ciontach de réir dlí.

3. Beidh ag gach duine a chúiseofar i gcion coiriúil na cearta íosta seo a leanas:

- (a) go n-inseofar gan mhoill dó, i dteanga a thuigfidh sé agus go mionchruinn, cineál agus cúis an chúisimh ina choinne;
- (b) chun a leordhóthain ama agus saoráidí a bheith aige chun a chosaint a ullmhú;
- (c) chun é féin a chosaint i bpearsa nó trí chúnamh dlí dá rogha féin nó, mura bhfuil sé acmhainneach ar íoc as cúnamh dlí, sin a fháil in aisce nuair is gá sin ar mhaithe leis an gceartas;
- (d) chun finnétithe ina choinne a cheistiú nó a chur á gceistiú agus finnétithe thar a cheann a thabhairt i láthair agus a cheistiú faoi na coinníollacha céanna a bhaineann le finnétithe ina choinne;
- (e) chun cabhair ateangaire a fháil in aisce mura féidir leis an teanga a úsáidtear sa chúirt a thuiscint nó a labhairt.

AIRTEAGAL 7

Gan phionós d'uireasa an dlí

1. Ní bhfaighfear aon duine ciontach in aon chion coiriúil i ngeall ar aon ghníomh nó neamhghníomh nár chion coiriúil é faoin dlí náisiúnta nó faoin dlí idirnáisiúnta tráth a dhéanta. Ná ní ghearrfar pionós níos troime ná mar ab infheidhme an tráth a rinneadh an cion coiriúil.

2. Beidh an tAirteagal seo gan dochar do thriail agus do phionósú aon duine i ngeall ar aon ghníomh nó neamhghníomh a bhí, tráth a dhéanta, coiriúil de réir na bprionsabal ginearálta atá aitheanta ag náisiúin shibhialta.

AIRTEAGAL 8

Ceart chun an saol príobháideach agus an saol teaghlaigh a urramú

1. Tá ag gach duine an ceart go ndéanfar a shaol príobháideach agus a shaol teaghlaigh, a chónaí agus a chomhfhreagras a urramú.
2. Ní chuirfidh údarás poiblí isteach ar fheidhmiú an chirt seo ach amháin i gcás ina mbeidh sé sin i gcomhréir leis an dlí agus riachtanach i sochaí dhaonlathach ar mhaithe leis an tslándáil náisiúnta, le sábháilteacht an phobail nó le leas eacnamaíoch na tíre, chun ainriail nó coireacht a chosc, chun sláinte nó moráltacht a chosaint, nó chun cearta agus saoirsí daoine eile a chosaint.

AIRTEAGAL 9

Saoirse smaoinimh, coinsiasa agus reiligiúin

1. Tá ag gach duine an ceart chun saoirse smaoinimh, coinsiasa agus reiligiúin; tá ar áireamh sa cheart sin saoirse chun a reiligiún nó a chreideamh a athrú agus saoirse, mar dhuine aonair nó i gcomhlúadar le daoine eile agus go poiblí nó go príobháideach, a reiligiún nó a chreideamh a léiriú trí adhradh, trí theagasc, trí chleachtas agus trí dheasghnáth.
2. Ní bheidh saoirse an duine a reiligiún nó a chreideamh a léiriú faoi réir teorainneacha ach a mhéid atá riachtanach i sochaí dhaonlathach ar mhaithe le sábháilteacht an phobail, chun an t-ord poiblí, sláinte an phobail nó moráltacht phoiblí a chosaint, nó chun cearta agus saoirsí daoine eile a chosaint.

AIRTEAGAL 10

Saoirse chun tuairimí a nochtadh

1. Tá ag gach uile dhuine an ceart ar shaoirse chun tuairimí a nochtadh. Folóidh an ceart sin saoirse chun tuairimí a bheith ag an

duine agus faisnéis agus barúlacha a fháil agus a thabhairt gan cur isteach ó údarás poiblí agus gan beann ar theorainneacha. Ní chuirfear leis an Airteagal seo cosc ar Stáit a cheangal go ndéanfar fiontair chraolta, teilifíse nó pictiúrlainne a cheadú.

2. Ó tharla go mbaineann dualgais agus freagrachtaí le feidhmiú na saoirsí seo, féadfar é a bheith faoi réir cibé foirmiúlachtaí, coinníollacha, srianta nó pionós a fhorordaítear le dlí agus atá riachtanach i sochaí dhaonlathach, ar mhaithe leis an tslándáil náisiúnta, le sláine chríche nó le sábháilteacht an phobail, chun ainriail nó coireacht a chosc, chun sláinte nó moráltacht a chosaint, nó chun cáil nó cearta daoine eile a chosaint, chun nochtadh faisnéise a fhaightear faoi rún a chosc, nó chun údarás agus neamhchlaontacht na breithiúnachta a chothabháil.

AIRTEAGAL 11

Saoirse comhthionóil agus comhlachais

1. Tá ag gach duine an ceart chun saoirse comhthionóil shíochánta agus chun saoirse comhlachais le daoine eile, lena n-áirítear an ceart chun bheith mar bhall de cheardchumainn chun a leasanna a chosaint.

2. Ní chuirfear srian ar fheidhmiú na saoirsí sin seachas den sórt a fhorordaítear le dlí agus atá riachtanach i sochaí dhaonlathach ar mhaithe leis an tslándáil náisiúnta nó sábháilteacht an phobail, chun ainriail nó coireacht a chosc, chun sláinte nó moráltacht a chosaint nó chun cearta nó saoirsí daoine eile a chosaint. Ní chuirfidh an t-airteagal seo cosc ar shrianta dleathacha a chur ar fheidhmiú na saoirsí sin ag comhaltaí na bhfórsaí armtha, na bpóilíní nó lucht riaracháin an Stáit.

AIRTEAGAL 12

Ceart chun pósadh

Tá ag fir agus mná atá in aois a bpósta an ceart chun pósadh agus an ceart chun teaghlach a bhunú, i gcomhréir leis na dlíthe náisiúnta lena rialaítear feidhmiú an chirt sin.

AIRTEAGAL 13

Ceart chun leigheas éifeachtach

Gach duine a ndéantar a chearta agus a shaoirsí, mar a leagtar amach iad sa Choinbhinsiún seo a shárú, beidh aige leigheas éifeachtach os comhair údaráis náisiúnta d'ainneoin gur daoine ag gníomhú dóibh i gcáil oifigiúil a rinne an sárú sin.

AIRTEAGAL 14

Toirmeasc ar idirdhealú

Daingneofar teachtadh na gceart agus na saoirsí a leagtar amach sa Choinbhinsiún seo gan idirdhealú ar aon fhoras amhail gnéas, cine, dath, teanga, reiligiún, tuairim pholaitiúil nó eile, bunadh náisiúnta nó sóisialta, baint le mionlach náisiúnta, maoin, breith nó stádas eile.

AIRTEAGAL 15

Maolú i gcás práinne

1. In aimsir chogaidh nó práinne poiblí eile lena mbagraítear shaol an náisiúin féadfaidh Ardpháirtí Conarthach bearta a ghlacadh de mhaolú ar a oibleagáidí faoin gCoinbhinsiún seo a mhéid a cheanglaítear go docht le riachtanais an cháis, ar choinníoll nach mbeidh na bearta sin ar neamhréir lena oibleagáidí eile faoin dlí idirnáisiúnta.

2. Ní dhéanfar aon mhaolú faoin bhforáil seo ar Airteagal 2, ach amháin maidir le básanna de thoradh gníomhartha cogaidh dlíthiúla, ná ar Airteagail 3, 4 (mír 1) agus 7.

3. Déanfaidh aon Ardpháirtí Conarthach a bhainfidh leas as an gceart seo chun maolú a dhéanamh, Ard-Rúnaí Chomhairle na hEorpa a chur ar an eolas go hiomlán maidir leis na bearta a ghlac sé agus na cúiseanna atá leo. Cuirfidh sé Ard-Rúnaí Chomhairle na hEorpa ar an eolas freisin nuair a thiocfaidh deireadh le feidhmíú na mbeart sin agus nuair a bheidh forálacha an Choinbhinsiúin go hiomlán i bhfeidhm arís.

AIRTEAGAL 16

Srianta ar ghníomhaíocht pholaitiúil eachtrannach

Ní mheasfar aon rud in Airteagail 10, 11 agus 14 mar chosc ar na hArdpháirtithe Conarthacha srianta a chur ar ghníomhaíocht pholaitiúil eachtrannach.

AIRTEAGAL 17

Toirmeasc ar chearta a mhí-úsáid

Ní léireofar aon ní sa Choinbhinsiún seo ar dhóigh a thabharfadh le tuiscint go bhfuil aon cheart ag aon Stát, grúpa nó duine chun gabháil d'aon ghníomhaíocht nó aon gníomh a dhéanamh arb é is aidhm dó aon cheann de na cearta nó na saoirsí atá leagtha amach sa Choinbhinsiún seo a mhilleadh nó iad a theorannú níos mó ná mar a fhoráiltear sa Choinbhinsiún.

AIRTEAGAL 18

Teorainn le húsáid srianta le cearta

Ní fheidhmeofar na srianta leis na cearta agus leis na saoirsí atá ceadaithe faoin gCoinbhinsiún seo chun aon chríche ach amháin na críocha lena bhforordaítear iad.

ROINN II

CÚIRT EORPACH UM CHEARTA AN DUINE

AIRTEAGAL 19

Bunú na Cúirte

D'fhonn comhlíonadh na ngealltanais atá glactha ag na hArdpháirtithe Conarthacha sa Choinbhinsiún agus sna Prótacail a ghabhann leis a áirithiú, bunófar Cúirt Eorpach um Chearta an Duine, dá ngairtear "an Chúirt" anseo feasta. Feidhmeoidh sí ar bhonn buan.

AIRTEAGAL 20

An líon breithiúna

Beidh an Chúirt comhdhéanta de líon breithiúna a bheidh ar cóimhéid le líon na nArdpháirtithe Conarthacha.

AIRTEAGAL 21

Na critéir don oifig

1. Beidh ard-cháil mhorálta ag na breithiúna agus caithfidh na cáilíochtaí riachtanacha chun ceapachán ard-phoist bhreithiúnaigh a bhaint amach a bheith acu, nó inniúlacht aitheanta mar dhlí-eolaí a bheith acu.

2. Beidh iarrthóirí níos óige ná 65 bliain d'aois ar an dáta faoinar iarradh an liosta triúr iarrthóirí leis an Tionól Parlaiminteach, de thoradh Airteagail 22.

3. Suífidh na breithiúna ar an gCúirt ina gcáil phearsanta.

4. Le linn a dtéarma oifige, ní dhéanfaidh na breithiúna aon gníomh nach luíonn lena neamhspleáchas, lena

neamhchlaontacht, ná le riachtanais oifige lán-aimseartha; is í an Chúirt a chinnteoidh gach ceist a eascróidh as feidhmiú na míre seo.

AIRTEAGAL 22

Breithiúna a thoghadh

Déanfaidh an Tionól Parlaiminteach na breithiúna a thoghadh, i dtaca le gach Ardpháirtí Conarthach, trí thromlach vótaí a chaithfear as liosta triúr iarrthóirí arna n-ainmniú ag an Ardpháirtí Conarthach.

AIRTEAGAL 23

Téarmaí oifige agus difhostú

1. Toghtar na breithiúna go ceann tréimhse naoi mbliana. Ní fhéadfar iad a atoghadh.
2. Beidh na breithiúna i seilbh oifige go dtí go gcuirtear duine ina n-ionad. Leanfaidh siad ar aghaidh, áfach, ag déileáil le cibé cásanna a bheidh cheana féin á mbreithniú acu.
3. Ní fhéadfar aon bhreitheamh a dhifhostú óna oifig mura gcinnfidh na breithiúna eile le tromlach dhá thrian go bhfuil scortha ag an mbreitheamh sin de na coinníollacha riachtanacha a chomhall.

AIRTEAGAL 24

Clárlann agus rapóirtéirí

1. Beidh Clárlann ag an gCúirt, a ndéanfar a feidhmeanna agus a heagrú a leagan síos i rialacha na Cúirte.
2. Tabharfaidh rapóirtéirí, a fheidhmeoidh faoi údarás Uachtarán na Cúirte, cúnaimh don Chúirt ina suí di i seisiúin breithimh aonair. Beidh siad ina gcuid de Chlárlann na Cúirte.

AIRTEAGAL 25

Cúirt Iomlánach

Déanfaidh an Chúirt iomlánach

- (a) a hUachtarán agus Leas-Uachtarán amháin nó beirt acu a thoghadh go ceann tréimhse trí bliana; féadfar iad a atoghadh;
- (b) Dlísheomraí a chur ar bun, a bhunófar go gceann tréimhse socraithe ama;
- (c) Uachtaráin Dhlísheomraí na Cúirte a thoghadh; féadfar iad a atoghadh;
- (d) rialacha na Cúirte a ghlacadh;
- (e) an Cláráitheoir agus Leas-Chláráitheoir amháin nó níos mó a thoghadh;
- (f) aon iarraidh faoi Airteagal 26, mír 2 a dhéanamh.

AIRTEAGAL 26

Formáid breithimh aonair, Coistí, Dlísheomraí agus Ard-Dlísheomra

1. Chun breithniú a dhéanamh ar chásanna os a comhair, súfidh an Chúirt mar fhoirmáid breithimh aonair, mar choistí triúir breithiúna, mar Dhlísheomraí seachtair breithiúna, agus mar Ard-Dlísheomra seacht mbreithiúna déag. Bunóidh Dlísheomraí na Cúirte coistí go ceann tréimhse socraithe ama.
2. Féadfaidh an Coiste Airí, ar iarraidh ón gCúirt iomlánach, trí chinneadh d'aon toil agus go ceann tréimhse socraithe, líon breithiúna na nDlísheomraí a laghdú go cúigear.
3. Agus é ina shuí mar bhreitheamh aonair, ní scrúdóidh breitheamh aon iarratas i gcoinne an Ardpháirtí Chonarthaigh ar thoghadh an breitheamh sin ina leith.

4. Suífidh an breitheamh a toghadh i leith an Ardpháirtí Chonarthaigh lena mbaineann mar chomhalta ex officio den Dlísheomra agus den Ard-Dlísheomra. Murab ann do bhreitheamh, nó mura bhfuil an breitheamh sin in ann suí, suífidh ina ionad duine i gcáil breithimh arna roghnú ag Uachtarán na Cúirte as liosta a bheidh curtha ar aghaidh roimh ré ag an bPáirtí sin.

5. Áireofar Uachtarán na Cúirte, na Leas-Uachtaráin, Uachtaráin na nDlísheomraí agus breithiúna eile a bheidh roghnaithe i gcomhréir le rialacha na Cúirte san Ard-Dlísheomra chomh maith. Nuair a tharchuirfear cás chuig an Ard-Dlísheomra faoi Airteagal 43, ní shuífidh san Ard-Dlísheomra aon bhreitheamh ón nDlísheomra a thug an breithiúnas, seachas Uachtarán an Dlísheomra agus an breitheamh a shuigh i leith an Ardpháirtí Chonarthaigh lena mbaineann.

AIRTEAGAL 27

Inniúlacht breithiúna aonair

1. Féadfaidh breitheamh aonair, maidir le hiarratas a chuirfear ar aghaidh faoi Airteagal 34, a dhearbhu go bhfuil sé neamh-inghlactha, nó é a scriosadh as liosta cásanna na Cúirte, i gcás go bhféadfar cinneadh den sórt sin a dhéanamh gan iniúchadh breise.

2. Cinneadh críochnaitheach a bheidh sa chinneadh sin.

3. Mura ndearbhóidh an breitheamh aonair go bhfuil iarratas neamh-inghlactha, nó mura scriosfaidh sé é, cuirfidh an breitheamh sin ar aghaidh chuig coiste nó chuig Dlísheomra é le haghaidh iniúchadh breise.

AIRTEAGAL 28

Inniúlacht Coistí

1. Maidir le hiarratas a chuirfear ar aghaidh faoi Airteagal 34, féadfaidh coiste, trí vóta d'aon toil,

(a) a dhearbhu go bhfuil sé neamh-inghlactha, nó é a scriosadh as a liosta cásanna, i gcás go bhféadfar cinneadh den sórt sin a dhéanamh gan iniúchadh breise; nó

(b) a dhearbhu go bhfuil sé inghlactha agus breithiúnas a thabhairt an tráth céanna ar na tuillteanais, má tá cásdlí dea-bhunaithe na Cúirte ann cheana maidir le buncheist an cháis, a bhaineann le léiriú nó cur i bhfeidhm an Choinbhinsiúin nó na bPrótacal a ghabhann leis.

2. Cinnfí agus breithiúnais chríochnaitheacha a bheidh sna cinnfí agus sna breithiúnais faoi mhír 1.

3. Mura bhfuil an breitheamh a thoghfear i leith an Ardpháirtí Chonarthaigh lena mbaineann ina chomhalta den choiste, féadfaidh an coiste, ag aon chéim de na himeachtaí, cuireadh a thabhairt don bhreitheamh sin ionad duine amháin de chomhaltaí an choiste a ghlacadh, ag féachaint do na tosca iomchuí uile, lena n-áirítear an ndearna an Páirtí sin feidhmiú an nós imeachta faoi mhír 1.(b) a chonspóid.

AIRTEAGAL 29

Cinnfí ó Dhlísheomraí maidir le hinghlacthacht agus tuillteanais

1. Mura ndéanfar cinneadh faoi Airteagal 27 nó 28, nó mura dtabharfar breithiúnas faoi Airteagal 28, déanfaidh Dlísheomra cinneadh maidir le hinghlacthacht agus maidir le tuillteanais iarratas aonair a bheidh curtha ar aghaidh faoi Airteagal 34. Féadfar an cinneadh maidir le hinghlacthacht a ghlacadh ar leithligh.

2. Déanfaidh Dlísheomra cinneadh maidir le hinghlachtacht agus maidir le tuillteanais iarratas idirstáit a chuirfear ar aghaidh faoi Airteagal 33. Déanfar an cinneadh maidir le hinghlachtacht a ghlacadh ar leithligh mura gcinneadh an Chúirt a mhalairt, i gcásanna eisceachtúla.

AIRTEAGAL 30

Scarúint le dlínse don Ard-Dlísheomra

Nuair a bheidh cás ar feitheamh os comhair Dlísheomra ina bhfuil ceist thromchúiseach maidir le léiriú an Choinbhinsiúin nó na bPrótacal a ghabhann leis, nó nuair a d'fhéadfadh réiteach ceiste os comhair an Dlísheomra toradh a thabhairt atá ar neamhréir le breithiúnas a bheidh tugtha cheana féin ag an gCúirt, féadfaidh an Dlísheomra, tráth ar bith sula dtabharfaidh sé a bhreithiúnas, scarúint le dlínse i bhfabhar an Ard-Dlísheomrandéanfaidh ceann de na páirtithe sa chás agóid.

AIRTEAGAL 31

Cumhachtaí an Ard-Dlísheomra

Déanfaidh an tArd-Dlísheomra

- (a) iarratais a bheidh curtha faoina bhráid faoi Airteagal 33 nó Airteagal 34 a chinneadh nuair a bheidh scartha le dlínse ag Dlísheomra faoi Airteagal 30 nó nuair a bheidh an cás tarchurtha chuige faoi Airteagal 43;
- (b) cinneadh a dhéanamh ar shaincheisteanna a bheidh tarchurtha chun na Cúirte ag an gCoiste Airí de réir Airteagal 46, mír 4; agus
- (c) iarrataí le haghaidh tuairimí comhairleacha a bheidh curtha faoina bhráid faoi Airteagal 47 a bhreithniú.

AIRTEAGAL 32

Dlínse na Cúirte

1. Leathfaidh dlínse na Cúirte chuig na hábhair uile a bhaineann le léiriú agus feidhm an Choinbhinsiúin agus na bPrótacal a ghabhann leis a bheidh tarchurtha chuige mar a fhoráiltear in Airteagail 33, 34, 46 agus 47.

2. I gcás díospóide i dtaobh an bhfuil nó nach bhfuil dlínse ag an gCúirt, is í an Chúirt a dhéanfaidh an cinneadh.

AIRTEAGAL 33

Cásanna Idirstáit

Féadfaidh aon Ardpháirtí Conarthach aon sárú líomhnaithe ar fhorálacha an Choinbhinsiúin, agus na bPrótacal a ghabhann leis, ó Ardpháirtí Conarthach eile a tharchur chun na Cúirte.

AIRTEAGAL 34

Iarratais aonair

Féadfaidh an Chúirt iarratais a fháil ó aon duine, aon eagraíocht neamhrialtasach, nó aon ghrúpa daoine aonair a éilíonn gur íospartach ar shárú iad ag ceann de na hArdpháirtithe Conarthacha ar na cearta a leagtar amach sa Choinbhinsiúin, nó sna Prótacail a ghabhann leis. Glacfaidh na hArdpháirtithe Conarthacha orthu féin gan bac a chur ar fheidhmiú éifeachtach an chirt sin.

AIRTEAGAL 35

Critéir inghlachta

1. Ní fhéadfaidh an Chúirt déileáil leis an ábhar gan na leigheasanna intíre uile a bheith idithe, i gcomhréir le gnáthrialacha

aitheanta an dlí idirnáisiúnta, agus laistigh de thréimhse ceithre mhí ón dáta ar a ndearnadh an cinneadh críochnaitheach.

2. Ní dhéileálfaidh an Chúirt le haon iarratas a bheidh curtha ar aghaidh faoi Airteagal 34 atá (a) gan ainm; nó (b) ar aon dul go substaintiúil, le hábhar a ndearna an Chúirt scrúdú air cheana nó atá curtha faoi bhráid nós imeachta iniúchta idirnáisiúnta nó nós imeachta socráithe idirnáisiúnta eile agus gan eolas ábhartha nua ann.

3. Maidir le haon iarratas a bheidh curtha ar aghaidh faoi Airteagal 34, dearbhóidh an Chúirt go bhfuil sé neamh-inghlactha más rud é:

(a) go bhfuil an tiarratas ar neamhréir le forálacha an Choinbhinsiúin nó na bPrótaca a ghabhann leis, go bhfuil sé go follasach gan bhunús, nó go bhfuil mí-úsáid cirt iarratais aonair ann; nó

(b) nach bhfuil míbhuntáiste suntasach fulaingthe ag an iarratasóir, mura bhfuil gá ann scrúdú a dhéanamh ar na tuilleánais san iarratas, ar mhaithe le hurraim do chearta an duine mar a mhínítear iad sa Choinbhinsiún agus sna Prótacail a ghabhann leis agus ar choinníoll nach ndíoltófar d'aon chás ar an bhforas sin ar chás é nach ndearna binse intíre a bhreithniú go cúí.

4. Diúltóidh an Chúirt d'aon iarratas a mheasann sí a bheith neamh-inghlactha faoin Airteagal seo. Féadfaidh sí é sin a dhéanamh ag aon chéim de na himeachtaí.

AIRTEAGAL 36

Idirghabháil tríú páirtí

1. I ngach cás os comhair Dlísheomra nó os comhair an Ard-Dlísheomra, beidh ceart ag Ardpháirtí Conarthach ar iarratasóir duine dá náisiúnaigh tráchtanna i scríbhinn a chur ar aghaidh agus páirt a ghlacadh sna héisteachtaí.

2. Féadfaidh Uachtarán na Cúirte, ar mhaithe le cuí-riarach an cheartais, cuireadh a thabhairt d'aon Ardpháirtí Conarthach nach páirtí sna himeachtaí, nó d'aon duine nach é an tiarratasóir é, tráchtanna i scríbhinn a chur ar aghaidh nó páirt a ghlacadh sna héisteachtaí.

3. I ngach cás os comhair Dlísheomra nó os comhair an Ard-Dlísheomra, féadfaidh Coimisinéir Chomhairle na hEorpa um Chearta an Duine tráchtanna i scríbhinn a chur ar aghaidh agus páirt a ghlacadh sna héisteachtaí.

AIRTEAGAL 37

Iarratais a scriosadh

1. Féadfaidh an Chúirt a chinneadh ag aon chéim de na himeachtaí iarratas a scriosadh as a liosta cásanna i gcás inarb é tátal na n-imthosca

(a) nach bhfuil rún ag an iarratasóir leanúint dá iarratas; nó

(b) gur socraíodh an t-ábhar; nó

(c) ar aon chúis eile arna bunú ag an gCúirt, nach bhfuil bonn cirt ann a thuilleadh chun leanúint de scrúdú an iarratais.

Leanfaidh an Chúirt le scrúdú a dhéanamh ar an iarratas, áfach, más gá déanamh amhlaidh ar mhaithe le hurraim do chearta an duine mar a mhínítear iad sa Choinbhinsiún agus sna Prótacail a ghabhann leis.

2. Féadfaidh an Chúirt a chinneadh iarratas a chur ar ais ar a liosta cásanna má mheasann sí go bhfuil bonn cirt ann déanamh amhlaidh.

AIRTEAGAL 38

Scrúdú an cháis

Déanfaidh an Chúirt scrúdú ar an gcás i gcomhar le hionadaithe na bpáirtithe agus, más gá, imscrúdú, a ndéanfaidh na hArdpháirtithe Conarthacha lena mbaineann na saoráidí uile is gá a chur ar fáil ar mhaithe lena sheoladh go héifeachtach.

AIRTEAGAL 39

Socraíochtaí cairdiúla

1. Féadfaidh an Chúirt, ag aon chéim de na himeachtaí, í féin a chur ar fáil do na páirtithe lena mbaineann chun socraíocht chairdiúil ar an ábhar a áirithiú ar bhonn urraim do chearta an duine mar a mhínítear iad sa Choinbhinsiún agus sna Prótacail a ghabhann leis.
2. Beidh imeachtaí a sheolfar faoi mhír 1 faoi rún.
3. Má bhaintear socraíocht chairdiúil amach, scríosfidh an Chúirt an cás as a liosta cásanna trí chinneadh nach mbeidh ann ach ráiteas gairid ar na fíricí agus ar an réiteach a bheidh bainteach amach.
4. Tarchuirfead an cinneadh seo chuig an gCoiste Airí, a dhéanfaidh maoirseacht ar fhorghníomhú théarmaí na socraíochta cairdiúla mar atá leagtha amach sa chinneadh.

AIRTEAGAL 40

Éisteachtaí poiblí agus rochtain ar dhoiciméid

1. Tionólfar éisteachtaí go poiblí mura gcinnfidh an Chúirt, i gcásanna eisceachtúla, a mhalairt.
2. Beidh doiciméid a thaisctear leis an gCláráitheoir ar fáil don phobal mura gcinnfidh Uachtarán na Cúirte a mhalairt.

AIRTEAGAL 41

Sásamh cóir

Má fhaigheann an Chúirt gur sáraíodh an Coinbhinsiún nó na Prótacail a ghabhann leis, agus mura gceadaítear ach sásamh páirteach le dlí inmhéanach an Ardpháirtí Chonarthaigh lena mbaineann, cuirfidh an Chúirt, más gá, sásamh cóir ar fáil don pháirtí dochraithe.

AIRTEAGAL 42

Breithiúnais Dlísheomraí

Tiocfaidh Breithiúnais Dlísheomraí chun bheith ina mbreithiúnais chríochnaitheacha i gcomhréir le forálacha Airteagal 44, mír 2.

AIRTEAGAL 43

Tarchur chuig an Ard-Dlísheomra

1. Féadfaidh aon pháirtí sa chás, i gcásanna eisceachtúla, laistigh de thréimhse trí mhí ó dháta bhreithiúnas an Dlísheomra, a iarraidh go dtarchuirfead an cás chuig an Ard-Dlísheomra.
2. Glacfaidh painéal de chúigear breithiúna ón Ard-Dlísheomra leis an iarraidh má dhúisíonn an cás ceist thromchúiseach a dhéanann dífead do léiriú nó d'fheidhm an Choinbhinsiúin nó na bPrótacal a ghabhann leis, nó ceist thromchúiseach a bhfuil tábhacht ghinearálta léi.
3. Má ghlacann an painéal leis an iarraidh, déanfaidh an tArd-Dlísheomra cinneadh ar an gcás trí bhreithiúnas.

AIRTEAGAL 44

Breithiúnais chríochnaitheacha

1. Breithiúnas críochnaitheach a bheidh i mbreithiúnas an Ard-Dlísheomra.

2. Tiocfaidh breithiúnas Dlísheomra chun bheith ina bhreithiúnas críochnaitheach
 - (a) i gcás ina ndearbhaíonn na páirtithe nach n-iarrfaidh siad go dtarchuirfear an cás chuig an Ard-Dlísheomra; nó
 - (b) trí mhí tar éis dháta an bhreithiúnais, murar iarradh an cás a tharchur chuig an Ard-Dlísheomra; nó
 - (c) i gcás ina ndiúltóidh painéal an Ard-Dlísheomra don iarraidh tarchur a dhéanamh faoi Airteagal 43.
3. Foilseofar an breithiúnas críochnaitheach.

AIRTEAGAL 45

Cúiseanna le breithiúnais agus le cinní

1. Tabharfar cúiseanna le breithiúnais chomh maith le cinní ina ndearbhaítear go bhfuil iarratais inghlactha nó neamh-inghlactha.
2. Mura gcuireann breithiúnas in iúl go hiomlán nó go páirteach tuairim na mbreithiúna d'aon toil, beidh aon bhreitheamh i dteideal tuairim a thabhairt ar leithligh.

AIRTEAGAL 46

Brí cheangailteach breithiúnas agus a bhforghníomhú

1. Gabhfaidh na hArdpháirtithe Conarthacha orthu féin cloí le breithiúnas críochnaitheach na Cúirte in aon chás ar páirtithe ann iad.
2. Tarchuirfear breithiúnas críochnaitheach na Cúirte chuig an gCoiste Airí, a mhaoirseoidh a fhorghníomhú.
3. Má mheasann an Coiste Airí go mbactar maoirseacht fhorghníomhú breithiúnais chríochnaitheach le fadhb a bhaineann le léiriú an bhreithiúnais, féadfaidh sé an t-ábhar a tharchur chun na Cúirte chun rialú a fháil ar cheist an léirithe. I gcás cinneadh chun tarchur a dhéanamh, beidh gá le vóta thiomlach dhá thrian de na hionadaithe atá i dteideal suí ar an gcoiste.

4. Má mheasann an Coiste Airí go ndiúltaíonn Ardpháirtí Conarthach cloí le breithiúnas críochnaitheach i gcás ar páirtí ann é, féadfaidh sé, tar éis fógra foirmiúil a sheirbheáil ar an bPáirtí sin agus trí chinneadh arna ghlacadh le vóta thiomlach dhá thrian de na hionadaithe atá i dteideal suí ar an gcoiste, ceist a tharchur chun na Cúirte i dtaobh ar mhainnigh an Páirtí sin a oibleagáid faoi mhír 1 a chomhlíonadh.

5. Má chinneann an Chúirt gur sáraíodh mír 1, tarchuirfidh sí an cás chuig an gCoiste Airí chun na bearta a bheidh le déanamh a bhreithniú. Má chinneann an Chúirt nár sáraíodh mír 1, tarchuirfidh sí an cás chuig an gCoiste Airí, a chuirfidh deireadh lena scrúdú ar an gcás.

AIRTEAGAL 47

Tuairimí comhairleacha

1. Féadfaidh an Chúirt, ar iarraidh ón gCoiste Airí, tuairimí comhairleacha a thabhairt maidir le ceisteanna dlí a bhaineann le léiriú an Choinbhinsiúin nó na bPrótacal a ghabhann leis.
2. Ní dhéilealfar i dtuairimí den sórt sin le haon cheist a bhaineann le hábhar nó raon feidhme na gceart nó na saoirsí a mhíntear i Roinn I den Choinbhinsiún agus sna Prótacail a ghabhann leis, nó le haon cheist eile ar cheist í a chaitheadh an Chúirt nó an Coiste Airí a bhreithniú de thoradh aon chineál imeachtaí den sort sin a d'fhéadfaí a thionscnamh i gcomhréir leis an gCoinbhinsiún.
3. I gcás cinní an Choiste Airí tuairim chomhairleach a iarraidh ón gCúirt, beidh gá le vóta thiomlach na n-ionadaithe atá i dteideal suí ar an gcoiste.

AIRTEAGAL 48

Dlínse chomhairleach na Cúirte

Cinnfidh an Chúirt an bhfuil iarraidh ar thuairim chomhairleach a bheidh curtha ar aghaidh ag an gCoiste Airí laistigh dá inniúlacht mar a mhínítear in Airteagal 47.

AIRTEAGAL 49

Cúiseanna le tuairimí comhairleacha

1. Tabharfar cúiseanna le tuairimí comhairleacha na Cúirte.
2. Mura gcuireann an tuairim chomhairleach in iúl, go hiomlán nó go páirteach, tuairim na mbreithiúna d'aon toil, beidh aon bhreitheamh i dteideal tuairim a thabhairt ar leithligh.
3. Cuirfear tuairimí comhairleacha na Cúirte in iúl don Choiste Airí.

AIRTEAGAL 50

Caiteachas ar an gCúirt

Íocfaidh Comhairle na hEorpa an caiteachas ar an gCúirt.

AIRTEAGAL 51

Pribhléidí agus díolúintí breithiúna

Beidh na breithiúna i dteideal, le linn feidhmiú a bhfeidhmeanna, pribhléidí agus saoirsí dá bhforáiltear in Airteagal 40 de Reacht Chomhairle na hEorpa agus sna comhaontuithe arna ndéanamh faoi.

ROINN III FORÁLACHA ILGHNÉITHEACHA

AIRTEAGAL 52

Fiosrúcháin ag an Ard-Rúnaí

Ar iarraidh a fháil ó Ard-Rúnaí Chomhairle na hEorpa, tabharfaidh aon Ardpháirtí Conarthach míniú maidir leis an modh lena gcinntítear go bhfuil aon cheann d'fhorálacha an Choinbhinsiúin á chur chun feidhme go héifeachtach lena dhlí inmhéanach.

AIRTEAGAL 53

Cosaint ar chearta an duine atá ann cheana

Ní fhorléireofar aon ní sa Choinbhinsiún seo mar ní lena gcuirtear teorainn le haon cheann de chearta an duine agus de na saoirsí bunúsacha a fhéadfar a áirithiú faoi dhlíthe Ardpháirtí Chonarthaigh ná faoi dhlíthe aon chomhaontú eile ar páirtí ann é, nó mar ní de mhaolú uathu.

AIRTEAGAL 54

Cumhachtaí an Choiste Airí

Ní dhéanfaidh aon ní sa Choinbhinsiún seo dochar do na cumhachtaí a thugtar don Choiste Airí le Reacht Chomhairle na hEorpa.

AIRTEAGAL 55

Modhanna eile um réiteach díospóide a eisiamh

Comhaontaíonn na hArdpháirtithe Conarthacha nach mbainfidh siad leas, seachas trí chomhaontú speisialta, as conarthaí, as coinbhinsiúin, ná as dearbhuithe a bheidh i bhfeidhm eatarthu chun díospóid a chur ar aghaidh, trí achainí, ar díospóid í a eascróidh as léiriú nó as feidhm an Choinbhinsiúin seo,

chuig meán socraíochta seachas iad siúd dá bhforáiltear sa Choinbhinsiún seo.

AIRTEAGAL 56

Feidhm chríochach

1. Féadfaidh aon Stát, tráth a dhaingnithe nó aon tráth ina dhiaidh sin, a dhearbhu trí fhógra arna dhíriú chuig Ard-Rúnaí Chomhairle na hEorpa go leathfaidh an Coinbhinsiún seo, faoi réir mhír 4 den Airteagal seo, chuig gach críoch nó aon chríoch a bhfuil sé freagrach as a chaidreamh idirnáisiúnta.
2. Leathfaidh an Coinbhinsiún chuig an gcríoch nó chuig na críocha a ainmneofar san fhógra amhail ón tríochadú lá tar éis d'Ard-Rúnaí Chomhairle na hEorpa an fógra a fháil.
3. Cuirfear forálacha an Choinbhinsiúin seo i bhfeidhm sna críocha sin agus aird chúí á tabhairt ar riachtanais áitiúla, áfach.
4. Féadfaidh aon Stát a bhfuil dearbhú déanta aige i gcomhréir le mír 1 den Airteagal seo, tráth ar bith ina dhiaidh sin a dhearbhu, thar ceann críche amháin nó níos mó lena mbeineann an dearbhú, go nglacann sé le hinniúlacht na Cúirte chun iarratais a fháil ó dhaoine aonair, ó eagraíochtaí neamhrialtasacha, nó ó ghrúpaí daoine aonair mar a fhoráiltear le hAirteagal 34 den Choinbhinsiún.

AIRTEAGAL 57

Forchoimeádais

1. Féadfaidh aon Stát, le linn dó an Coinbhinsiún seo a shíniú nó le linn dó a ionstraim dhaingniúcháin a thaisceadh, forchoimeádais a dhéanamh maidir le haon fhoráil áirithe den Choinbhinsiún a mhéid nach bhfuil an dlí a bheidh i bhfeidhm ina chríoch i gcomhréir leis an bhforáil sin. Ní chéadófar forchoimeádais de chineál ginearálta faoin Airteagal seo.

2. Beidh in aon fhorchoimeádais a dhéantar faoin Airteagal seo ráiteas gearid maidir leis an dlí lena mbeineann.

AIRTEAGAL 58

Séanadh

1. Ní fhéadfaidh Ardpháirtí Conarthach an Coinbhinsiún seo a shéanadh ach amháin ar cúig bliana a bheidh caite ón dáta a tháinig sé chun bheith ina pháirtí ann agus tar éis fógra sé mhí a bheidh ar áireamh i bfógra a bheidh dírithe chuig Ard-Rúnaí Chomhairle na hEorpa, agus cuirfidh sé nó sí an méid sin in iúl do na hArdpháirtithe Conarthacha eile.
2. Ní bheidh d'éifeacht ag an séanadh sin an tArdpháirtí Conarthach atá i gceist a fhuascailt óna oibleagáidí faoin gCoinbhinsiún seo maidir le haon ghníomh a d'fhéadfadh a bheith ina shárú ar na hoibleagáidí sin agus a d'fhéadfadh a bheith déanta aige roimh an dáta a tháinig an séanadh sin in éifeacht.
3. Scoirfidh aon Ardpháirtí Conarthach de bheith ina Pháirtí don Choinbhinsiún seo nuair a scoirfidh sé de bheith ina chomhalta de Chomhairle na hEorpa, faoi na coinníollacha céanna.
4. Féadfar an Coinbhinsiún a shéanadh i gcomhréir le forálacha na míreanna roimhe seo i ndáil le haon chríoch ar dearbhaíodh réim a bheidh ag an gCoinbhinsiún maidir léi.

AIRTEAGAL 59

Síniú agus daingniú

1. Beidh an Coinbhinsiún seo ar fáil le haghaidh síniú chomhaltaí Chomhairle na hEorpa. Daingneofar é. Taiscfear na daingniúcháin le hArd-Rúnaí Chomhairle na hEorpa.
2. Féadfaidh an tAontas Eorpach aontú a dhéanamh leis an gCoinbhinsiún seo.

3. Tiocfaidh an Coinbhinsiún seo i bhfeidhm nuair a thaiscfear deich n-ionstraim dhaingniúcháin.

4. Maidir le haon sínitheoir a dhaingneoidh iardain, tiocfaidh an Coinbhinsiún i bhfeidhm ar an dáta a thaiscfear a ionstraim dhaingniúcháin.

5. Cuirfidh Ard-Rúnaí Chomhairle na hEorpa teacht i bhfeidhm an Choinbhinsiúin, ainmneacha na nArdpháirtithe Conarthacha a dhaingnigh é, agus taisceadh na n-ionstraimí daingniúcháin a dhéanfar iardain in iúl do chomhaltaí uile Chomhairle na hEorpa.

Arna dhéanamh sa Róimh, an 4ú lá de Shamhain 1950, i mBéarla agus i bhFraincis, an dá théacs comhúdarásach, i gcóip amháin a bheidh ar taisceadh i gcartlann Chomhairle na hEorpa. Tarchuirfidh an tArd-Rúnaí cóipeanna deimhnithe chuig gach sínitheoir.

Coinbhinsiún Eorpach um Chearta an Duine

European Court of Human Rights
Council of Europe
67075 Strasbourg cedex
France
www.echr.coe.int